

2007 – 2017: Dîs agns di politiche linguistiche regjonâl pal furlan

2^e Conference regjonâl di verifiche e di propueste su la atuazion de Leç Regjonâl 29/2007

A son passâts aromai dîs agns di chel Dicembar dal 2007 cuant che, daspò di un procès lunc e condividût, ma ancje complês, il Consei regjonâl al à fate buine la Leç Regjonâl 29/2007 “Normis pe tutele, valorizazion e promozion de lenghe furlane”. Une Leç impuartante che tal so percors di stesure e à viodût la partecipazion ative de societât civîl, a dimostrazion di trope atenzion che e je ator di chest argoment.

L’interès de Region pe politiche linguistiche al è nassût tancj agns indaûr. La prime leç regjonâl in materie e je dal 1996, trê agns prime che il Stât talian al fasès buine la Leç 482 su lis minorancis linguistiche storichis. Za in chês volte la Region e à precorût i tîmps, e ancje cu la Leç 29 e je stade fra lis primis in Italie a aprovâ une leç di politiche linguistiche in linie cui standard europeans. Une leç che e vûl organizâ i interventis di tutele e di promozion de lenghe in ducj i setôrs de societât, par rindi normâl l’ûs de lenghe furlane.

La presince di trê minorancis linguistiche e je simpri stade impuartante pe specialitât regjonâl; za tal Statût Speciâl dal ’63 ur vignivin ricognossûts dirits e tutele. Une legitimazion che tai agns e je stade rinfuarcide cu la aplicazion di leçs di pueste. Tal 1963, il Friûl - Vignesie Julie e la Europe a jerin cetant diferents rispjet a vuê, ma za in chês volte si è mostrât di vê une vision vierte e inclusive, metint in vore daurman il sproc unîts

te diversitât, che vuê al è il fundament de Union Europeane. Furlan, sloven e todesc a metin la region tal cûr de Europe: propit par chest il Consei Regjonâl

al à ritignût impuartant jentrâ a fâ part, intal 2014, dal Network to Promote Linguistic Diversity, un organisim che al met adun lis plui grandis Regjons europeanis dulà che a son presintis minorancis linguistiche. Une ocasion impuartante par confrontâsi cun altris realtâts sui argoments che a saran aprofondîts ancje te Conference che si davuelzarà a Udin al inizi dal Dicembar che al ven.

La seconde Conference di verifiche su la Leç Regjonâl 29/2007 e je stade pensade propit par fotografâ ce che al è stât fât dilunc di cheste legislature e par discuti sul lavôr dai prossims cinc agns. Une ocasion di analisi e di confront par valutâ i progrês e i risultâts otignûts, ma ancje lis criticitâts che a ralentin la metode in vore ad implen de Leç. Un moment di valutazion e di propueste dulà che, dongje de riflessione sul stât atuâl di tutele e di promozion de lenghe, ducj i sogjets interessâts e i citadins furlans a son clamâts a dâ il lôr contribût.



CONFERENCE REGJONÂL
 SU LA LENGHE FURLANE

La cabine di regjie e i grups di lavôr

La Conference e je la fase finâl di un percors che al à viodude la partecipazion ative di cuatri grups di lavôr setoriâi rappresentâfs dai setôrs là che la Region e à decidût di concentrâ lis ativitâts di valutazion: istruzion, mieçs di comunicazion, politiche linguistiche e aministrazion publiche. I grups a son stât constituîts de Cabine di Regjie istituide dal Consei regjonâl par organizâ la Conference. La Cabine, cun a cjâf il Conseîr Segretari Claudio Violino, e je componude dai rappresentants de Zonte Regjonâl, de Universitât dal Friûl, dal Ufici scolastic regjonâl, de ARLeF e de Assemblee de Comunitât linguistiche furlane.

Ogni Grup di Lavôr al à viodude la partecipazion dai principâi puartadôrs di interès dai setôrs cjapâts in considerazion, e par ognidun, la Cabine di Regjie e à individuât un coordinadôr, component dal Comitât Tecnic-Scientific de ARLeF, che al à organizât e gjestît il lavôr e scrit la relazion finâl che e sarâ presentade te Conference. I grups a àn lavorât daûr di un scheme condividût e comun che ur à permetût di fâ un cuadro de situazion atuâl de tutele e promozion de lenghe furlane par ognidun dai setôrs studiâts. Il prin pas al è stât chel de racuelte dai dâts relatîfs ai projets metûts in vore tai ultims cinc agns par podê fotografâ la situazion gjenerâl, su cheste si è po passâts ae analisi aprofondide.

Par ogni argoment a son stadis valutadis lis buinis pratiche, ma ancje lis criticitâts, a son stadis discutudis lis cuistions presentadis dai singui components di ogni grup e e je stade fate une comparazion jenfri lis disposizions di Leç e la realtât de sô metode in vore.

La part finâl des relacions e je propositiva, e à il fin di cjâlâ indevant ai cinc agns che a vegnin, par capî cemût miorâ l’impat de Leç e la sô aplicazion.

Il program

Al inizi di Dicembar che al ven si davuelzarà a Udin la Conference di verifiche e di propueste su la Leç Regjonâl 29/2007 Normis pe tutele, valorizazion e promozion de lenghe furlane, promovude dal Consei Regjonâl e organizade de ARLeF-Agjenzie regjonâl pe lenghe furlane. L’apontament, viert al public, al è par vinars il prin di Dicembar tal Auditorium de Region in vie Sabbadini 31, e par sabide ai 2 tal Salon dal Parlament dal Cjistiâl.

Vinars si tacarà aes 8:30 cu la acetazion e registrazion dai partecipants e i salûts des autoritâts regjonâls. Des 10:00 si jentrarà tal vîf cui interventis dai ospits internazionâi, par presentâ cualchi buine pratiche a nivel european (Frisie, Galizie, Gales).

Si passarà po ae analisi de situazion furlane cu la presentazion des relacions tematiche prontadis dai grups di lavôr. La matine, aes 11.30 Erika Adami e presenterà il stât di tutele de lenghe furlane tai media e aes 12.30 Patrizia Pavatti e presenterà la situazion de lenghe furlane te istruzion. Daspò gustât, aes 14:30, Marco Stolfò al presenterà la relazion su la aministrazion publiche e aes 15:30 Donato Toffoli al sierarà cun chês su la politiche linguistiche. Dopo ogni intervent al sarâ dât un adeguât spazi pal dibatit.

I lavôrs vierts al public si sieraran aes 16:30, cuant che i grups si cjataran par prontâ i documents finâl che a tignaran cont des osservazions saltadis fûr dilunc de zornade, e che a saran presentâts dai coordinadôrs sabide ai 2 aes 10:00 di matine tal Cjistiâl di Udin. Lis conclusions si tignaran aes 11.00.

Lis relacions tematiche si puedin za lei sui sîts de ARLeF (www.arlef.it) e dal Consei Regjonâl (www.consiglio.regione.fvg.it), dulà che si cjate ancje il program in detai des dôs zornadis.

La prime zornade de Conference e sarâ **trasmetude in streaming sul sît www.fvg.tv** e sul **Canâl 690** dal digjitâl terestri.